

Visoki predstavnik Inzko se sastao sa slovenačkim predsjednikom Pahorom i ministrom vanjskih poslova Erjavecom



Visoki predstavnik Valentin Inzko danas je posjetio slovenačku prijestolnicu Ljubljanu, gdje se sastao sa slovenačkim predsjednikom Borutom Pahorom i ministrom vanjskih poslova Karlom Erjavecom. Razgovarali su o trenutnoj političkoj situaciji u BiH i težnjama Bosne i Hercegovine da se priključi evroatlantskim integracijama.

Visoki predstavnik je informirao svoje domaćine o dva paralelna i međusobno kontradiktorna politička trenda u BiH, od kojih se jedan odnosi na pozitivne korake koje je BiH poduzela u pravcu integracije u EU, što potvrđuje činjenica da je Bosni i Hercegovini nedavno upućen upitnik EU. Visoki predstavnik u potpunosti podržava te aktivnosti. S druge strane, postoji suprotan trend obilježen retorikom kojom se poziva na podjele, prijeti da preuzme uticaj nad procesom integracija i dovede zemlju u tešku situaciju.

Tokom sastanaka sa slovenačkim zvaničnicima, visoki predstavnik je izrazio zahvalnost Republici Sloveniji na njenoj neprekidnoj podršci suverenitetu i teritorijalnom integritetu BiH, kao i njenoj evropskoj budućnosti.